

deliurer de la peine qu'il auroit souffert apres le decez de sa mere; ils en auroient fait tout autant de luy, s'il n'eust déjà esté grandelet. Nous l'auions nommé Fortuné deuant son baptesme. Monsieur de Champlain, luy donna nom Bonauenture, quand il fut fait Chrestien; & certes, *funes ceciderunt ei in præclaris*. Son exemple nous fait esperer, qu'il n'y aura naturel si farouche en ces deferts, que nostre Seigneur n'adoucisse par sa grace, quand il luy plaira.

Le quatrième de Iuin, arriua des Hurons vn ieune François, lequel s'estant mis avec quelques Algonquins au commencement de l'hyuer, à dessein d'apprendre leur langue, ils le conduiserent par terre, ou plustost par neige, iusques aux païs des Hurons; ce fut vne hardie entreprife & bien difficile. Nos Peres furent bien estonnez, & bien ioyeux de le voir en vn temps si extraordinaire, ils nous écriurent à son retour, qu'ils auoiët baptisé prés de soixante Sauuages depuis [214] le vœu que nous fîmes tous le iour de la Conception de la saincte Vierge, & que les Peres que nous leur enuoyâmes l'an passé estoient arriuez en bonne fanté par la grace de nostre Seigneur, qui va tous les iours applanissant les plus grandes difficultez de ce voyage. Ces Algonquins alloient là pour solliciter les Hurons de venir en guerre avec eux contre les Hiroquois.

Le vingt-huictiesme du mesme mois, Monsieur du Pleffis Bochart General de la flotte, monta iusques à Kébec, & nous réioüit fort par sa presence; nous le remerciaâmes de sa faueur ordinaire, & de la charité qu'il exerce enuers les Peres qui passent dans son Vaiffeau; le Pere Ragueneau, & nostre Frere Louis Gobert estoient dans sa Barque.